

BOSNA I HERCEGOVINA
Federacija Bosne i Hercegovine
UNSKO – SANSKI KANTON
Skupština



BOSNIA AND HERZEGOVINA
Federation of Bosnia and Herzegovina
UNA – SANA CANTON
Assembly

Poslanička pitanja

sa VIII redovne sjednice Skupštine Unsko – sanskog kantona
koja je održana 13.07.2015. godine

Bihać, 13. juli 2015. godine

Predsjedavajući Skupštine Unsko – sanskog kantona, Nijaz Hušić:

Prvi za zastupničko pitanje se javio Kantarević Rasim. A slijedeći neka se pripremi Albin Muslić.

Poslanik Rasim Kantarević:

Poštovani gospodine Predsjedavajući.

Ja za današnju sjednicu imam jedno poslaničko pitanje. U skladu sa Članom 190. Poslovnika o radu Skupštine Unsko – sanskog kantona postavljam pitanje Kantonalnoj Upravi za inspeksijske poslove, uz slijedeće obrazloženje, i molim pismeni odgovor.

U Velikoj Kladaši se već gotovo godinu dana vodi bitka za dobijanje koncesije za kamenolom u Marjanovcu. Poduzeće AS AGROFENIKS je u skladu sa zakonom podnijelo zahtjev za dobivanje koncesije na javnom dobru. Naglašavam, kamenolom u Marjanovcu je javno dobro i podliježe Zakonu o koncesiji, za čije provođenje je zadužena Komisija za koncesije Unsko – sanskog kantona. Komisija je uradila svoj dio posla, AS AGROFENIKS svoj dio, preostalo je samo da općinsko vijeće usvoji odluku kako bi općina dobila prihod koji joj po ovom osnovu pripada. Dok se čeka da načelnik pripremi materijal za općinsko vijeće i na istom donese odluka, kriminalci odvoze pijesak iz kamenoloma Marjanovac i prodaju ga na okolnim gradilištima i domaćinstvima. Krađa pijeska sa kamenoloma Marjanovac događa se već mjesecima, policija je obaviještena, postoje zapisnici sa uviđaja, neki od počinioca u zadnjem naletu krađe su privedeni, međutim krađa se ponavlja. Pijesak koji se prodaje iz kamenoloma Marjanovac je kradena roba. Onaj ko odvozi pijesak iz kamenoloma nema otpremnicu ni prevoznicu, onaj ko naplaćuje nema račun jer nije registriran, onaj ko kupuje mora znati da kupuje kradenu robu i da po zakonu je saučesnik u krađi.

Moje pitanje Kantonalnoj Upravi za inspeksijske poslove glasi:

Koje radnje ste poduzeli u sankcioniranju počinitelja krađe na kamenolomu Marjanovac, zbog štete koja svakim danom postaje sve veća, kako za AS AGROFENIKS, tako i za lokalnu zajednicu?

Molim što hitniji odgovor.

Zahvaljujem.

Predsjedavajući Skupštine Unsko – sanskog kantona, Nijaz Hušić:

Zahvaljujem. Kolega Albin Muslić. A neka se pripremi Amir Murić.

Poslanik Albin Muslić:

Uvaženi Predsjedavajući, kolegice i kolege poslanici, ministri u Vladi Unsko – sanskog kantona, predstavnici medija, nevladinog sektora, gosti, poštovani građani.

Imam dva poslanička pitanja. Prvo pitanje je:

Kada će Vlada Unsko – sanskog kantona u Skupštinu Unsko – sanskog kantona uputiti plan i program aktivnosti u cilju oživljavanja privrede na Unsko – sanskom kantonu?

Budući da smo u ekspozu Premijera prije tačno 158 dana čuli da će Premijer zajedno sa ministrima sagledati postojeće stanje, te pripremiti plan aktivnosti vezano za razvoj privrede, smanjenje broja nezaposlenih i svih onih negativnih trendova na Unsko – sanskom kantonu. Dakle, pitanje je kada će Vlada kantona uputiti konkretan plan i program aktivnosti u cilju privrednog oživljavanja Unsko – sanskog kantona, a pod tim podrazumjevam i revitalizaciju brojnih preduzeća, od pokretanja DI SANICE, problema KOMBITEKSA, ŽITOPRERADE, ŽELJEZARE i drugih preduzeća, da ih ovdje sada ne nabram.

Drugo pitanje naslovljeno je na Ministarstvo obrazovanja, nauke, kulture i sporta Unsko – sanskog kantona, a odnosi se na izgradnju zgrada Pravnog i Ekonomskog fakulteta u Bihaću. Tokom 2012. godine Vlada kantona je platila zemljište za izgradnju zgrade Pravnog i Ekonomskog fakulteta Općini Bihać, sada Gradu Bihaću, u iznosu od 780.000 konvertibilnih maraka. Tada je prema Zakonu o građevinskom zemljištu Univerzitet u Bihaću stekao pravo korištenja radi gradnje navedenih objekata i menadžment Pravnog, a mislim i Ekonomskog fakulteta, da su poduzeli određene aktivnosti vezano za izradu idejnog projekta i glavnog projekta ovih objekata. Međutim, od tada do danas ništa se nije uradilo. Problem je nepostojanje upravnog odbora na nivou Univerziteta u Bihaću koji treba da da svoju saglasnost na izradu idejnog i glavnog projekta. A opet idejni i glavni projekat su preduvjeti za apliciranje na ozbiljna finansijska sredstva. Na žalost, izgradnja tih zgrada zahtjeva određena finansijska sredstva, a da bi mi mogli ta sredstva i obezbjediti nužno je aplicirati na brojne međunarodne i domaće konkurse, pozive, koji se odnose na izgradnju ovih objekata. Istovremeno, nedavno održana akreditacija Univerziteta u Bihaću, a jedan od kriterija je i prostorni kriterij, je konstatirano između ostalog da se što prije treba u funkciji opstojnosti Univerziteta u Bihaću razriješiti pitanje prostornih kapaciteta, evo kroz ova dva fakulteta. Naravno, planirana je izgradnja ovih zgrada i ovo zemljište koje je kupio Unsko – sanski kanton nalazi se trenutno kod sadašnjeg Tehničkog fakulteta, tako da bi mi stvorili preduvjete za izgradnju Kampus Univerziteta u Bihaću, zajedno sa tamo i Visokom Zdravstvenom Školom. Dakle, molim ministra obrazovanja da da odgovor na ova pitanja.

Kada će upravni odbor Univerziteta u Bihaću i druge institucije odraditi svoje potrebne aktivnosti u cilju pribavljanja ovih potrebnih projektnih dokumenata?

Hvala lijepo.

Predsjedavajući Skupštine Unsko – sanskog kantona, Nijaz Hušić:

Amir Murić. A neka se pripremi Rasim Pajić.

Poslanik Amir Murić:

Dame i gospodo, dobar dan.

Ja ću danas postaviti dva pitanja. Prvo pitanje ide ministru zdravstva, rada i socijalne politike Unsko – sanskog kantona i upravnom odboru Doma Zdravlja Bihać.

Kako svi znate da se ova Vlada na čelu sa Premijerom Saračevićem najviše trsila da će raditi u skladu sa zakonom, moje informacije su da većina konkursa za odabir direktora zdravstvenih ustanova se raspisuje ne u skladu sa zakonom. U skladu sa federalnim zakonom, da bi neko bio direktor zdravstvene ustanove, mora imati završen menadžment i to tri stepena i dobiti zvanje top menadžera i na taj način može biti direktor jedne zdravstvene ustanove. Evo za primjer, 08.07. u Službenim Novinama Federacije BiH je raspisan konkurs za izbor direktora Zdravstvene Ustanove Dom Zdravlja u Bihaću i u tom konkursu nema tog uslova koji po zakonu treba da bude.

Pa moje pitanje ministru i upravnom odboru koji je raspisao taj oglas:

Zašto nisu raspisali oglas u skladu sa zakonom?

I da se očituju pismeno o ovom mom navodu.

I drugo pitanje je ponovo ministru zdravstva, rada i socijalne politike:

Kad ću dobiti odgovor na pitanje kolike su plate direktora javnih zdravstvenih ustanova?

Kad znamo da je Vlada 2013. godine donijela odluku kojom je definisala primanja svih direktora zdravstvenih ustanova, zavoda zdravstvenog osiguranja i službe za zapošljavanje i na osnovu toga su definisane i visine tih plata. Naše su informacije da te plate za duplo prelaze odluku koju je Vlada donijela. Ja sam postavio pitanje prije nekih četiri, pet Skupština, da se meni odgovori. Još nisam dobio odgovor. Evo ponovo vršim pritisak da dobijem taj odgovor.

Hvala.

Predsjedavajući Skupštine Unsko – sanskog kantona, Nijaz Hušić:

Rasim Pajić. A neka se pripremi kolega Halilović.

Poslanik Rasim Pajić:

Imam jedno zastupničko pitanje. Naslovljeno je na Javno Preduzeće Ceste Federacije BiH. Ono glasi:

Javno Preduzeće Ceste Federacije BiH Sarajevo, u smislu odredaba Člana 13. Stav 2. Zakona o cestama Federacije BiH ima svojstvo upravitelja svih magistralnih cesta na području Federacije BiH. Kroz Unsko – sanski kanton proteže se magistralna cesta M 4 2, koja je najfrekventnija cesta na području kantona. Na djelu predmetne ceste, tačnije u naselju Puškari u Cazinu u nazad dvije godine došlo je do oštećenja iste zbog pojave klizišta. Vaša ustanova je u dva navrata izvršila privremenu sanaciju nastalog klizišta koja nije imala nikakav efekat s obzirom da je u nazad godinu dana ponovo pojavilo se klizište na tom terenu. Usljed čega je u cjelosti oštećena jedna kolovozna traka. Od tad pa sve do danas na tom djelu magistralne ceste niste izvršili nikakvu sanaciju, tako da se saobraćaj odvija samo jednom kolovoznom trakom. Kako se radi o oštećenju najfrekventnije ceste na području Unsko – sanskog kantona, te kako se u nazad godinu dana saobraćaj vozila odvija samo jednom kolovoznom trakom i s obzirom da je činjenica da se radi o djelu koji je zbog konfiguracije terena nepregledan, tražim da se hitno izvrši sanacija, izvrši trajna sanacija predmetne magistralne ceste u skladu sa izrađenom projektnom dokumentacijom i svim pravnim normama koje regulišu ovu oblast. Neophodno je znači da izvršite, odgovorite na ovo pitanje u pisanoj formi i da u što kraćem roku izvršite sanaciju predviđene ceste, navedene ceste. Još jednom da napomenem da je u tom djelu neposredno znači, možda prije jedno pedesetak metara čak bilo i smrtnih slučajeva. Prema tome, to jest još jedan apel ovoj instituciji da u što kraćem roku izvrši sanaciju ove ceste. Toliko.

Hvala.

Predsjedavajući Skupštine Unsko – sanskog kantona, Nijaz Hušić:

Zahvaljujem. Halilović Hajrudin. A neka se pripremi kolega Ćufurović

Poslanik Hajrudin Halilović:

Maksuz selam i lijep pozdrav.

Moje poslaničko pitanje se odnosi ministru za obrazovanje, nauku, kulturu i sport.

Jedan dio prosvetnih radnika, jedan dio sindikata, pita da li je počela ta priprema sistematizacije, odnosno promjene plana i programa u Prosvetno – pedagoškom Zavodu, odnosno standardizacije u obrazovanju, dakle da li je broj đaka primjeren u određenim odjeljenjima, po standardima, pedagoškim standardima? Dokle je stiglo, ako jest, ta početa procedura, dokle je ta procedura stigla i za kad će biti završena?

Molim pisani odgovor. Dakle, da li je počela priprema učenika za standardizaciju po standardima Prosvetno – pedagoškog Zavoda?

Drugo pitanje jeste zapravo pitanje koje sam ja postavio prije četiri sedmice, odnosno prije dvije Skupštine. Istom ministarstvu, gdje sam tražio od ministra da obrazloži mi pismeno ko donosi odluke za djecu sa posebnim potrebama za slušanje nastave. Gdje je ministar obrazložio da to ustvari kolektiv nastavnika dogovori praktično, da neko dijete ima posebne potrebe. To se dalje proslijedi sa nejasnim odgovorom kome dalje. I onda napisao je da je zapravo sad formirana jedna skupina, odnosno jedna komisija pri ministarstvu koja će u daljem procesu određivati koje dijete će biti tretirano u tom smislu. A suština je u tome da već postoji preko 50 djece koja su proglašena sa posebnim potrebama. To je jedna stvar. Druga stvar, da kolektiv nije institucija, dakle kolektiv učiteljica, nastavnika i tako dalje, nije institucija koja može nečije dijete proglasiti sa posebnim potrebama. I nije neuropsihijatar svugdje u svijetu odvojeno neurologija od psihijatrije, jedino kod nas na Unsko – sanskom kantonu i još nekim institucijama ostala kao zajednička institucija koja to može da proglasi. Prema tome, ja od ministra tražim da usaglasi to. Jer će jedan dio te djece koja danas se proglašavaju sa posebnim potrebama, možda biti sutra ministri ili će se nekad prijaviti na mjesto direktora, pa će im u papirima pisati da su bila djeca sa posebnim potrebama, što ih automatski možda diskvalificira. Ja sam odgovor od ministra proslijedio, četiri, pet građana čija su djeca proglašena. I mislim da će uslijediti za to tužbe.

Hvala lijepo.

Predsjedavajući Skupštine Unsko – sanskog kantona, Nijaz Hušić:

Zahvaljujem. Kolega Ćufurović. A neka se pripremi Kenan Keserović

Poslanik Asmir Ćufurović:

Uvaženi Predsjedavajući, ministri u Vladi Unsko – sanskog kantona, predstavnici medija, Međunarodne zajednice, kolegice zastupnice i kolege zastupnici, ja vas sviju selamim i pozdravljam.

Evo ja želim iskoristiti priliku da aktualiziram jedan problem kojim se susreću pripadnici boračkih populacija, a čije rješenje je u nadležnosti ministarstva za pitanje boraca, ratnih vojnih invalida i šehidskih porodica. Naime, Zakonom o dopunskim pravima boraca, ove populacije ostvarile su određena prava, a između ostalog i pravo na oslobađanje naknade prilikom ishodovanja odobrenja za građenje stambenih objekata. Jedna od naknada koje su oslobođene ove populacije je i naknada za atomsko sklonište, a u njihovo ime to finansira nadležno ministarstvo. S obzirom da se ova naknada plaća prilikom ishodovanja odobrenja za građenje, pripadnici ovih populacija koji koriste ovo pravo preko nadležnog ministarstva, imaju problem, jer općine neće da izdaju ovo odobrenje za građenje dok se ne izvrši uplata. A nadležno ministrastvo poprilično dugo drži i ne uplaćuje ta sredstva, i po godinu dana. Tako da su ove populacije po tom pitanju zakinite po ostvarivanju ovog prava. S obzirom da se radi o malom iznosu sredstava, to je na godišnjem nivou negdje oko 70.000, ove godine u budžetu, ja apelujem i na nadležno ministarstvo da se ovaj problem aktualizira prema jedinicama

lokalne samouprave kako bi i ove populacije ovo pravo u potpunom kapacitetu mogle ostvariti.

Zahvaljujem.

Predsjedavajući Skupštine Unsko – sanskog kantona, Nijaz Hušić:

Kenan Keserović. A neka se pripremi kolega Mirković.

Poslanik Kenan Keserović:

Evo koristim priliku da vas sve srdačno pozdravim.

Na temelju Člana 84. Poslovnika Skupštine Unsko – sanskog kantona, upućujem inicijativu za uklanjanje arhitektonskih barijera s ciljem omogućavanja pristupačnosti za osobe sa umanjnim tjelesnim mogućnostima, odnosno sposobnostima, u svim kantonalnim i općinskim institucijama na području Unsko – sanskog kantona. Inicijativu upućujem prema Vladi Unsko – sanskog kantona, Ministarstvu za građenje, prostorno uređenje i zaštitu okoliša Unsko – sanskog kantona, Komisiji za prostorno uređenje, zaštitu okoliša, stambeno – komunalnu politiku i infrastrukturu, te svim općinama na području Unsko – sanskog kantona.

Što se tiče obrazloženja, naime danas imamo jasno definisane standarde za uklanjanje arhitektonskih barijera s ciljem omogućavanja pristupačnosti za osobe sa umanjnim tjelesnim mogućnostima koji su definisani Uredbom o prostornim standardima, urbanističko – tehničkim uslovima i normativima za sprječavanje stvaranja arhitektonsko – urbanističkih prepreka za osobe sa umanjnim mogućnostima, znači Službene Novine Federacije Bosne i Hercegovine 48/09 od 27.07.2009. godine. Zatim Zakon o prostornom uređenju i građenju, Službeni Glasnik Unsko – sanskog kantona broj: 10/11 od 27.06.2011. godine gdje je tačno u Članu 82. definisana obaveza osiguranja i nesmetanog pristupa, kretanja, boravka i rada za lica sa umanjnim tjelesnim sposobnostima. U građevinama znači za koje je izdano odobrenje, znači za građenje, ili koje su izgrađene prije donošenja ovog zakona, arhitektonske barijere koje onemogućavaju pristup i kretanje osobama sa umanjnim tjelesnim sposobnostima, ukloniće se u roku od pet godina od dana na stupanje ovog zakona na snagu. Međutim situacija na terenu je suprotna onom propisanom i jako je loša. Znači već naredne godine ističe ova obaveza u skladu sa ovim zakonom. Ovim putem moram istaći, ali i zahvaliti svim onima koji su to već napravili. Međutim, prema provedenim istraživanjima više je onih koji nisu napravili ništa pri uklanjanju arhitektonskih barijera, ili su napravili ali nisu u skladu sa onim standardima što zakon propisuje. Ukoliko uzmemo primjer znači prvo zgrada Vlade Unsko – sanskog kantona, gdje su smještena znači dva ministarstva, ministarstvo za građenje, prostorno uređenje i zaštitu okoliša, ministarstvo pravosuđa i uprave i ostali, ona znači nema, nisu uklonjene arhitektonske barijere za pristup invalidnim osobama. Zato u ime svih osoba sa umanjnim tjelesnim mogućnostima, sposobnostima, kao ravnopravnim građanima ovog kantona, tražim da pokrenete uklanjanje arhitektonskih barijera na svim institucijama od kantonalnog i općinskog značaja, odnosno izgradite rampe i kosine za pristup

sa invalidskim kolicima, te zaštitne ograde, znači rukohvate uz stepeništa i rampu. Obzirom što sam i malo prije rekao, da iduće godine ističe rok određen ovim zakonom, neophodno je znači da se na vrijeme pristupi pripremama, te da se u potpunosti obezbjedi primjena ovog zakona na objektima koji su u vlasništvu kantonalnih i općinskih institucija i na taj način da se pozitivnim primjerom pokaže dosljednost u provođenju donešenih zakona ali i poštivanju prava osoba sa umanjnim tjelesnim mogućnostima, odnosno sposobnostima.

Hvala.

Predsjedavajući Skupštine Unsko – sanskog kantona, Nijaz Hušić:

Zahvaljujem. Željko Mirković. A neka se pripremi kolega Kadirić.

Poslanik Željko Mirković:

Gospodine Predsjedavajući, uvažene kolegice i kolege poslanice i poslanici, predstavnici Vlade, predstavnici međunarodnih organizacija, predstavnici medija, dragi naši sugrađani, odnosno građani i građanke Unsko – sanskog kantona koji pratite prenos ove sjednice Skupštine putem Radio – Televizije Unsko – sanskog kantona, sve vas skupa pozdravljam.

Ja zapravo nemam novih pitanja, međutim u skladu sa Članom 191. Stav 4. i 6. ja želim izraziti svoje nezadovoljstvo sa ne dobijanjem odgovora na do sada postavljena pitanja. I ja ću ovim putem napomenuti i zamoliti Predsjedavajućeg da upotrijebi svoj autoritet i da nađe način da poslanici dobijaju redovno odgovore na svoja pitanja kako je to Poslovníkom i predviđeno. Radi se o pitanju koje sam uputio prema Zavodu zdravstvenog osiguranja, gdje je 7 i pol miliona konvertibilnih maraka potrošeno, a da nismo dobili odgovor na koji način, po kojim odlukama i ko je to odlučio i ko je donosio odluke kada su ova sredstva raspoređivana. Bilo je dosta o tome priče, da ne ponavljam. Drugo moje pitanje je Zavodu za zapošljavanje, gdje sam ja tražio da mi se dostavi rang lista svih primljenih u radni odnos, koji su ustvari zasnovali u ovom zavodu. Također nekoliko puta već to napominjem, nekoliko Skupština, odgovora nema. Također sam tražio odgovor po isplatama, odnosno vezano za isplate po tužbama koje duguje Unsko – sanski kanton prema prosvetnim radnicima, ko je dakle do sada dobio te isplate, u kom iznosu, odnosno po presudama koje su utvrđene, da li sa kamatama, bez kamata. Nisam ni taj odgovor dobio. I četvrto pitanje za koje takođe nisam dobio odgovor, a tiče se zdravlja naših građana, riječ je o deponiji na Vučijaku koja nije više obezbjeđena na način kako bi to trebalo biti. I moje pitanje je bilo da li ocjedne te vode koje se ustvari tu sad gomilaju gdje je ta pokrivka probijena, da li ugrožava zdravlje građana i kakva je situacija kada je u pitanju izvorište Klokot i drugi izvori koji gravitiraju u tome području, naročito nakon padavina. Obzirom da ja evo ne dobijam pitanja, ja o tome obavještavam i Skupštinu i javnost. Ja sam prisiljen tražiti i druga rješenja da bih dobio to pitanje.

S toga za početak postavljam pitanje, odnosno zahtjevam od Stručne Službe Skupštine Unsko – sanskog kantona da moje pitanje koje sam proslijedio Zavodu za zapošljavanje, proslijedi i

ministru unutrašnjih poslova, kako bi evo putem, pošto smatram da to nije urađeno u skladu sa zakonom, da i ministarstvo unutrašnjih poslova iz svoje nadležnosti provede određenu istragu i da me o tome obavijesti pismeno, odnosno obavijesti Skupštinu Unsko – sanskog kantona, kako bi mogli obavijestiti o tome i javnost. Dakle, radi se o rang listi, o famoznim kriterijima, ličnom dojmu, diskrecionom pravu, na bazi čega je i izvršen izbor ovih uposlenika. Ja želim znati i javnost ima pravo da to zna i onih 300, odnosno 295 drugih koji su nezadovoljni. Treba da znaju koji su to bili kriteriji i kako je ko ocjenjen, odnosno svih 300 kako su ocjenjeni po tim kriterijima. Zato, to je sasvim logično da mora postojati određena rang lista, kako bi mi svi bili upoznati sa tim procesom.

Hvala vam lijepo.

Predsjedavajući Skupštine Unsko – sanskog kantona, Nijaz Hušić:

Kadirić Nijaz. A neka se pripremi gospodin Farko Hodžić.

Poslanik Nijaz Kadirić:

Poštovani Predsjedavajući, ministri u Vladi, uvažene kolege, dame i gospodo, ispred Kluba Saveza za Bolju Budućnost svima srdačan selam i pozdrav.

Ja ću iskoristiti ovo vrijeme za poslaničko pitanje da ustvari prokomentarišem ili pročitam odgovor na prošlo, u obavezi prema građanima koji su tražili da postavim to poslaničko pitanje. Tiče se regionalnog puta R 405. Odgovor je slijedeći:

Direkcija cesta Unsko – sanskog kantona Bihać planira prema usvojenom planu i programu rada za 2015. godinu nastaviti izgradnju pješačkih staza u naselju Poljak u vrijednosti od 46.000 maraka, izgraditi novi most preko rijeke Blihe u naselju Donji Kamengrad u vrijednosti 210.000 maraka, izvršiti radove vanrednog održavanja u vrijednosti 50.000 maraka, te sve poslove redovnog održavanja koji uključuju čišćenje kolovoza, objekata, odvodnje, cestovnog pojasa, krpanja udarnih rupa, sanaciju makadamskog kolovoza i tako dalje. Napominjemo da su i prethodne godine vršeni radovi redovnog i vanrednog održavanja, te da je izgrađen most u Gornjem Kamengradu u vrijednosti od 170.000 maraka, te da je izrađen glavni projekat konstrukcije dionice ceste Sanski Most – Sasina dužine 4 kilometra u vrijednosti 18.000 maraka.

Također želim da se zahvalim Direkciji za ceste koja je nakon poslaničkog pitanja vezano za dionicu u Fajtovcima koja je godinu dana stajala devastirana, ovih dana ona je popravljena. Toliko.

Hvala.

Predsjedavajući Skupštine Unsko – sanskog kantona, Nijaz Hušić:

Zahvaljujem. Gospodin Farko Hodžić. A neka se pripremi kolega Beganović.

Poslanik Farko Hodžić:

Poštovani građani, uvažene kolegice i kolege, ministri u Vladi, poštovani gosti, odnosno ovi koji su došli ovdje s namjerom da danas prezentuju nam svoje izvještaje.

Ja ću postaviti poslaničko pitanje jedno i drugo je jedan zahtjev.

Prvo, Finansijskim planom Zavoda zdravstvenog osiguranja za 2015. godinu koji je usvojila ova Skupština, na strani 10, u stavu 10, na strani 10, u stavu 6, piše: „Za 2015. godinu apotekarska djelatnost će se finansirati, pojedinci usluge, priznavanje maloprodajne marže u visini 1 30 plus 17% PDV-a za pojedinačnu cijenu lijeka, odnosno po receptu“. Mi smo danas na sjednici komisije dobili saznanja da su ugovori potpisani, gdje nije ovo ispoštovano, već da je to jedna marka. S toga tražim od Zavoda zdravstvenog osiguranja i ministarstva zdravlja da mi dostavi odgovor na ovo pitanje:

Da li je ovo ispoštovano, šta je istina i šta je sa ovim?

Drugo, ministarstvu finansija. Kao poslanik u skladu sa Poslovníkom Skupštine tražim da mi se dostavi subanalitika od 31.03. do današnjeg dana, isplaćeno po grantovima prema usvojenom budžetu.

Hvala lijepa.

Predsjedavajući Skupštine Unsko – sanskog kantona, Nijaz Hušić:

Gospodin Beganović. A neka se pripremi kolega Egrlić.

Zamjenik Predsjedavajućeg Skupštine Unsko – sanskog kantona Mirvet Beganović:

Poštovane dame i gospodo, Predsjedavajući, Sekretaru, ministri iz Vlade, predstavnici međunarodnih organizacija, predstavnici javnih ustanova, kolegice i kolege, koristim priliku da vas srdačno pozdravim.

Ja imam jedno reagiranje na odgovor i imam jednu inicijativu.

Prvo je odgovor na poslaničko pitanje koje sam postavio 01.06. a vezano je da li postoji baza podataka o projektima javnih investicija na Unsko – sanskom kantonu i zašto je došlo do zastoja. Dobio sam odgovor od ministarstva. I to pokazuje samo jedan, stanje u kojem se nalazimo, a to je da od 2.800.000.000 koliko je u Federaciji investicija, kanton 72.000.000, realizirao samo 8.000.000, 5% ukupno. Ministarstvo nadležno ne raspolaže znači sa bazom,

vodi se kod Federalnog Zavoda za statistiku, što znači da su to samo statistički podaci koji nemaju onu funkciju, jer znamo kako se danas statistika vodi. I s druge strane, konstatacije same Razvojne Agencije koja kaže kada govorimo o dostupnim sredstvima, već sada imamo problem da sredstava ima a da nemamo kapaciteta da privučemo sredstva. To govori i o ovom drugom dijelu, imamo pritiske lokalnih zajednica, jedan dio tih projekata je kod lokalnih zajednica, projekti odobreni kreditom, Vlada Federacije bila garant, Vlada kantona i općine su bile te koje trebaju da povuče sredstva. Mnogi projekti još nisu ni krenuli i plaćaju se penali. Zato je neophodno da se naprav i jedan strateški pristup, da vide koje su to javne investicije u skladu sa zakonom federalnim, Federalnog Zakona o budžetu, gdje je tačno definisano da moraju biti predviđena sredstva i namjena tih sredstava i da vidimo šta je prioritet za ovaj kanton. Koji su to projekti, prioriteti? Evo danas smo imali jednu inicijativu oko tvornice kartonske ambalaže. Trebalo je napraviti jedan strateški pristup, da sva poduzeća kojima je vlasnik, kojim raspolaže kanton i na bazi toga napraviti koncept kako pristupiti da ne bude ovo što se desilo danas. Evo najbolji dokaz, da stečajni sudija je čim je Vlada donijela odluku, pokrenuo, neko je došao i kupio jer je vidio da tu ima. Da se provelo, neko bi došao do značajne imovine kad se rasterete hipoteke i zahtjevi povjerioca, ostaje vrijednost imovine koja je obezvrjeđena, koja se kupuje za male pare. A imamo podatke iz tvornice kartonske ambalaže, za 3.000 maraka i za 200.000 certifikata kupiti su značajni poslovni prostori u tvornici kartonske ambalaže, što su koristili pojedini privatnici i ostali, a nisu radnici plaćeni, iako su od te privatizacije trebali biti plaćeni.

Moje drugo obraćanje, inicijativa, jeste ministarstvu obrazovanja, Premijeru i Vladi Unsko – sanskog kantona, a odnosi se na Područnu Školu Stabandža.

Nisam htio da pitam kad će biti, postavio sam to pitanje. Uložena su sredstva federalnog ministarstva, djeca su išla u poslovni prostor, u trgovinu, u mekteb, zato što ne završava se ta škola. Imaju i danas sredstva, oprema, sve, međutim općina je nešto blokirala, došlo je do zastoja. Da se uključe da stvarno to riješe. Obećano je da će to početi u školskoj godini u septembru. Znamo da ima sad osmi mjesec, može se to realizirati. Jer stvarno, ja sam bio, posjetio taj objekat, nedostaje malo da se taj objekat završi, da ta djeca pređu u tu školu. Ima opravdano. Da se to konačno privede namjeni. Čak učešće građane iz dijaspore su spremni da se uključe da se taj projekat završi. Zato nisam išao, već inicijativu, ako treba mole da se završi to pitanje prije početka školske godine, da ne bi ponovo djeca, roditelji djeci zabranili da idu, imali smo problem da je bio zastoj da djeca nisu išla dvije, tri sedmice u školu.

Hvala lijepo.

Predsjedavajući Skupštine Unsko – sanskog kantona, Nijaz Hušić:

Kolega Egrlić. A neka se pripremi kolega Hadžipašić.

Poslanik Ahmet Egrlić:

Uvažene zastupnice i zastupnici, cjenjeni gosti, koristim priliku da vas sve skupa poselamim i pozdravim.

Ja imam dva zastupnička pitanja. Prvo pitanje je već ranije postavio kolega Muslić i ne znam da li je dobio odgovor u zadnje vrijeme, a radi se o fabrici u Sanici Drvnoj Industriji Sanica. Naime, „Unsko – sanske Šume“ su kupile Drvnu Industriju Sanica, urađen je elaborat o ekonomskoj opravdanosti, međutim ni do danas nemamo informacije u kojoj je fazi pokretanje proizvodnje u Drvnoj Industriji Sanica. I zato evo molim dakle nadležne u „Unsko – sanskim Šumama“ da nam dostave dakle odgovor u kojoj su fazi pripreme za pokretanje proizvodnje u Drvnoj Industriji Sanica i zapošljavanje novih ljudi?

Moje drugo pitanje je također vezano za Drvnu Industriju Sanica. Naime, iz stečajne mase koja je plaćena prilikom kupovine od strane „Unsko – sanskih Šuma“, plaćene su i određene obaveze prema Zavodu za zapošljavanje, dakle izmirene su sve obaveze po osnovu osiguranja od nezaposlenosti, ali još uvijek nije isplaćena i počela isplata naknade radnicima, koji su naravno nakon toga završili u Zavodu za zapošljavanje. Da li ima tu nekakvih administrativnih problema, da li ima nekakvih prepreka administrativnih, šta treba mi da uradimo i možemo li uopće nešto uraditi da krene ta isplata? Jednostavno, evo radnici su dolazili ovdje, razgovarali, ali nema nikakvog odgovora. I ja molim nadležne dakle da u što kraćem roku odgovore na pitanje kada će krenuti isplate od sredstava osiguranja od nezaposlenosti za radnike Drvne Industrije Sanica i ima li nešto šta mi možemo uraditi da otklonimo eventualne administrativne prepreke za isplatu ovih sredstava?

Hvala vam lijepo.

Predsjedavajući Skupštine Unsko – sanskog kantona, Nijaz Hušić:

Kolega Hadžipašić.

Poslanik Admir Hadžipašić:

Ja svoje prvo pitanje postavljam Ministarstvu pravde Unsko – sanskog kantona.

Tražim da mi se dostavi informacija, u proteklom periodu koliko je iz budžeta Unsko – sanskog kantona izdvojeno sredstava kao kazna zbog nerada sudija u općinskim i kantonalnim sudovima na području Unsko – sanskog kantona?

Činjenica je, imamo obrazloženje ove odluke, znači činjenica da sudije na području našeg kantona imaju veoma visoka primanja, a da sve više imamo zahtjeve stranaka koje vode postupke pred općinskim i kantonalnim sudovima i koji se obraćaju Ustavnom Sudu koji donosi presude da je kanton obavezan da nadoknadi štetu strankama u postupku, s obzirom da im nije postupak okončan u zakonom predviđenom roku, odnosno nije blagovremeno okončana ta procedura. Pa me interesira, znači da ministarstvo pravde pripremi takvu jednu

informaciju i da nam ovdje na Skupštinu dostavi tu informaciju. Koliko ja imam podatke, oni su nezvanični, da se radi o nekoliko stotina hiljada maraka koje kanton izdvoji znači iz budžeta za plaćanje takvih vrsta kazni.

Ja se zahvaljujem.

Predsjedavajući Skupštine Unsko – sanskog kantona, Nijaz Hušić:

Zahvaljujem. Time smo iscrpili dakle poslanička pitanja. Ja molim Skupštinsku Službu da proslijedi sva ova vaša pitanja na tražene adrese u skladu sa Poslovníkom i Ustavom kantona.